


吾學編

十九冊

四十四之七



名臣記


本三至本二

漢書門
八六四
前八
三〇
冊架函號類

雜史

內閣文庫
漢書
八六四
三〇
冊架函號類

內閣文庫
番號 漢 8864
冊數 30 (19)
函號 290 10



綴じ部(喉部分)の文字など開きが不鮮明な箇所あり







皇明名臣記第二十三卷


吾學編第四十四

淺草文庫

海鹽鄭曉

尚書劉文安公

公名定之字主靜永新人正統元年進士授翰林  
 編修四年京城大水詔求直言公上十事留中進  
 侍講 景帝登極又言十事乞奪德勝門戰功陞  
 職以崇廉耻作敵愾陞洗馬尋進右庶子北虜邀  
 使廷議未決公言宜遣使縻虜我得益修內治天  
 順元年改通政司叅議兼侍讀成化二年南陽卒  
 上欲得人入內閣勅王忠肅慎簡擬上柯潛萬安





公葉盛吳節上用公陞太常少卿兼侍讀學士三年進工部侍郎兼翰林學士明年改禮部公在內閣再進密疏皆國家大計公博學能文性尤孝友微時苦家貧授徒資束修爲養旣仕分祿自甘菲惡色溫氣和與物無忤至居官論議據理直言畧無沮忌卒贈禮部尚書謚文安

太傅丘文莊公

公名濬字仲深瓊山人景泰五年進士改庶吉士授編修少天資過人孤貧力學爲庶吉士益務博讀群書經史百家箋疏今古文詞至小醫老釋外

家小說靡不覽觀爲文章不求奇古平易順暢可讀成化元年爲侍講修英宗實錄或曰于少保死以不軌蓋正其罪公曰已巳之變可無譙哉謙功大過亦不可掩竟錄其實兩廣用兵公上南陽平寇方略奇公言繳上請付總帥陞侍講學士內艱服闋還職五年陞翰林學士十二年爲國子祭酒十六年進禮部右侍郎掌監事公嚴立師道綜理詳察采諸儒言行事著家禮儀節集朱文公微言彙爲二十篇倣論語爲朱子學的以通鑑綱目義重正統秦隋漢唐之交予奪太速稍次其世變



升降治亂大端與國統偏全作世史正綱爲大學  
衍義補補真西山衍義治國平天下事附以當世  
利害大學衍義補初成適泰陵即位表上覽上  
喜命陞公尚書禮部掌詹事府事時年餘七十矣  
弘治四年副總裁 憲宗實錄成加太子太保是  
年兼文淵閣大學士入內閣上時政疏畧曰成化  
間彗星三見徧掃三垣地無慮五六百震邇者彗  
見天津地震天鳴無虛日且異鳥三鳴于禁中考  
諸經史天變莫大於彗幸在三垣三台九重地變  
莫大於震動在京師邊防爲急刻會鳥動物得氣  
之先春秋二百四十二年書彗字者三地震者五  
飛禽者二今乃屢見于二十五六年之間變不虛  
生必有其應天人相與甚可畏也臣願體上天仁  
愛念 祖宗基業端身以立本清心以應務謹好  
尚勿流于異端節財費勿至于耗國公任用勿失  
于偏聽禁私謁以肅內政明義理以絕神奸慎儉  
德以懷永圖勤政務以弘至治庶可以回天災消  
物異帝王之治可幾也疏凡十餘萬言七年陞少  
保改尚書戶部大學士武英殿公每以寬大啓上  
心忠厚變士習平順正文體經濟覈人材更張立



治體又請訪求遺書 上知公老儒讀書事上輒  
允吏部考察外官斥二千人公以為非唐虞九載  
三考之法又非 祖宗制請 上凡歷官未二載  
者且復任任雖經一考非貪暴蹤跡顯著者且勿  
斥一時不肖者皆喜然自是貪殘吏日肆三原在  
吏部持正不肯徇人公不說會劉醫官素出入公  
家失職憾誣許三原衆皆疑劉醫官疏出公意以  
故臺諫交劾公公乞老未允八年卒贈太傅謚文  
莊公好論議上下千古尤熟 國家典故政事可  
否反覆與大臣言官爭是非即未必一一中適然  
不肯媿媿取悅商確往事時出意見自高奇矯衆  
論能以辯博濟其說人莫能難如論秦檜稱其於  
宋有再造功與虜和不為無見范仲淹生事岳飛  
未必能恢復皆怪詭可駭其絕元正統斥許衡不  
當仕元又嘗言我朝相業三楊偉矣然當其時南  
交叛逆軒龍易位勅使旁午頰泛西洋曾無一語  
權歸常侍遠征麓川兵連禍結極於土木之變誰  
實啓之皆正論也

太保劉文和公

公名翊字叔溫壽光人正統十三年進士改庶吉



名目言  
士授編修歷修撰天順初陞右中允七年陞侍講  
學士侍東宮東宮即位陞太常少卿兼侍講學士  
實錄成進卿仍兼職內艱服除還任成化十年陞  
吏部左侍郎兼官如故明年兼翰林學士入內閣  
十三年進戶部尚書明年加太子少保兼文淵閣  
大學士十八年修續資治通鑑綱目纂文華大訓  
成進太子太保謹身殿大學士公鄙薄萬安時對  
客罵安負國無耻安積聞恨公百計中傷二十一  
年九月致仕去卒贈太保謚文和公美姿容善談  
論遇人無矯飾景泰初議迎鑾成化初議

睿皇

后喪禮末年論李孜省左道亂政動搖國本密疏  
昌言卒定儲位有大臣之節當是時公與博野同  
在內閣人稱公東劉博野北劉林俊嘗曰余以妖  
僧孽寺售術貢邪肆興土木不揆狂躁上干宸怒  
萬頸俱縮縛下詔獄鬼錄爲伍惟公立爲上解  
乃得薄謫崔銑曰公秉心不疑諒直無顧而讒嫉  
肆作構惡於群小假威於邏卒竟去位嘉靖二年  
言官疏公孝友孚化於鄉閭爲立昭賢祠祀公

太傅謝文正公

公名遷字于喬餘姚人成化十一年進士授修撰



十九年陞右諭德二十三年陞左庶子兼翰林侍  
讀弘治四年陞少詹事兼侍讀學士憂去八年與  
長沙同入內閣十一年加太子少保兵部尚書兼  
東閣大學士十六年加太子太保禮部尚書兼武  
英殿大學士十八年加少傅兼太子太傅尚書大  
學士如故恭陵大漸入受顧命康陵即位奄瑾專  
政公不得其職正德元年乞致仕去瑾指公等爲  
奸黨矯上旨榜示天下成化弘治間翰林聲望  
最重者吳文定公及公二人皆進士第一人儀幹  
修整文定溫粹含弘公明暢亮直文定詩文尤有  
古意一時並負公輔之望丘文莊卒文定適憂去  
公入內閣十餘年間號能持正不失爲賢相文定  
竟不得入內閣洛陽爲首相公數言文定洛陽曰  
吾且去用之未晚他日又言又曰我且去用之未  
晚公曰吾豈私原博耶顧渠科第先予年齒先予  
望實先予予越次在此慚焉故言之而公終不聽  
耶洛陽笑不答正德初天變輔臣皆上章自劾公  
求去不得復上疏薦文定及王文恪自代公初入  
內閣宜興洛陽相繼爲首相當是時長沙位在公  
上凡條答敷奏章疏皆出長沙公與洛陽並勒致



仕長沙爲首相文恪以時望所屬焦芳欲援以爲  
重告瑾內閣宜南北各用一人以故芳與文恪同  
入內閣嘉靖初遣使存問公謝疏曰臣匪才誤蒙  
孝宗知遇顧託之重欲圖報稱不自知其力之不  
足旣而格心無術輔導不效引身退避杜門省愆  
俯仰懷慚罪責難追分與草木同腐幸溝壑未填  
遇 皇帝聖明嗣承天統一新萬化疲困更生如  
臣衰朽特軫聖慈不加負國之誅重錫優老之典  
寵命下及慚懼交并顧茲垂暮之年諒無圖報之  
日惟有一言獻納庶幾少效涓埃臣聞傳說告高  
宗曰學于古訓乃有獲又曰監于先生成憲其永  
無愆古訓者二帝三王之典謨訓誥及諸經史之  
所載者是已成憲者 聖祖神宗之典章法度凡  
今諸司之所職者是已仰惟聖性睿哲生知而聖  
德成就必資問學經筵儒臣分直進講所以薰陶  
涵養者在是燕閒之時尤宜博覽群籍以廣見聞  
苟有疑義難明即召勸講之臣面賜質問務求通  
解戒一暴十寒之失積日就月將之功則聖學緝  
熙追縱古昔帝王之盛近代不足言矣我朝 祖  
宗之法斟酌古今之宜諸司而能恪守萬世可以



常行柰何世遠人亡政久弊積漸失其初者有矣  
聽覽之際宜申飭百司講求成憲苟有空礙難行  
即召執政之臣面加商確務合舊制究詰舛訛之  
端振革廢弛之弊則聖政有恒而聖治之成可以  
紹休祖宗垂裕無疆矣夫一日萬幾固未易縷陳  
而一心萬化惟在於知要臣故特舉君道之至要  
以裨聰明之萬一其他軍民利病政治缺失陛下  
明詔許諸人直言無隱况以言為職者林立于廷  
必能為陛下次第陳之惟望留神省覽兼聽廣納  
不以踈淺而或遺不以拂逆而見拒則宗社幸甚  
生靈幸甚嘉靖六年春復召入內閣尋進戶部尚  
書大學士如故明年三月乞歸十一年卒年八十  
贈太傅謚文正

太傅王文恪公

公名鏊字濟之吳人成化十一年進士公幼穎悟  
不凡十六隨父讀書太學太學諸生爭傳誦其文  
侍郎葉盛提學御史陳選嘗寄公天下士初授翰  
林編修閉門力學避遠權勢弘治初滿九載陞侍  
講實錄成陞右諭德八年薦陞侍講學士無日講  
公學問贍博有識鑒為文春容爾雅議論決暢試



士南宮專尚經術險麗奇袤者一切屏去弘治間  
文體一變士習稍端公有力焉東宮將出閣大臣  
請選正人端國本首薦公九年兼諭德十一年陞  
少詹事兼侍講學士十三年陞吏部右侍郎時鈞  
陽代金陵爲尚書洪洞及公爲侍郎會虜火篩入  
寇公上籌邊八事一定算二重主將三嚴法令四  
恤邊民五廣召募六用間七分兵八出奇遂薦秦  
紘起陝西總制又請科貢之外略訪前代制科如  
博學宏詞之類以收異才六年一舉舉不過十餘  
人其翹然出類者儲之翰林餘補科道部屬中書  
先有官者量材加秩數年之後士類濯磨必以通  
經學古爲高而脫去謏聞之陋矣其選將才亦然  
十六年憂去正德元年復除侍郎兼學士會災異  
謝公求退薦公自代當是時八奄導 上遊狎中  
外洵洵臺諫交論不聽洪洞時爲戶部尚書與諸  
大臣伏闕請誅八奄召諸大臣至左順門中官傳  
諭甚厲衆相視莫敢發言公對曰八人者不去亂  
本不除竟不能去八奄遂分布要路瑾入司禮監  
首逐洪洞繼逐劉謝欲引吏部尚書焦芳入內閣  
廷議推公瑾恨公迫公論不得已公遂與芳同入



內閣進戶部尚書文淵閣大學士逾年加少傅改武英殿上時政四事曰講學曰延下曰用人曰節用時瑾方威鉗士類按索微瑕輒枷械死公謂瑾曰士大夫可殺不可辱辱而殺之吾尚何顏於此瑾恨洪洞不巳必欲置死地又欲以他事中劉謝公前後力救得免瑾又欲殺華容逮詔獄坐激變土官罪死公曰土官未叛何名爲激變或惡楊文襄於瑾謂築邊大費瑾又欲罪之公曰楊總制高才備略爲國修邊豈可以功罪初瑾見公開誠與言亦強聽公言芳專事媵阿瑾驕倖日甚公無可柰何居常戚戚四年夏力求去瑾每念公相忤又輒發怒欲中傷公公惴惴杜門瑾敗得免嘗自贊曰噫嘻先生何如其人窮年校書結髮勵行白首於道茫然無聞者乎爵厠公孤官居臺閣志懷輸忠幾昧納約者乎貴戚赫炎不能附麗權璫狂猘不能媵阿一有違言超然不辱者乎遇事直前不知顧忌見利思義不知規避歸卧空山晏然寤寐者乎斯人也其量則隘其才則庸無裨于世自潔其躬跡其所至蓋知慕首陽之節而不知柱下之工知希止足之䟽而不能爲應變之崇者乎居閑



十餘年論薦文章嘉靖初遣行人存問曰朕行且  
召卿公䟽謝乞上講學親政講學篇曰國家經筵  
之設盛矣經筵一開天下欣欣焉傳之以爲希濶  
之典其間寒暑皆輟春秋之月月不過三日三日  
之期風雨則免政事有妨則免講之日夙具講章  
至期講訖綸音賜宴儼然而退上下之情未見其  
親且密也至於日講可謂親矣然體分過嚴上有  
疑焉未嘗問也下有見焉未嘗獻也昔高宗學于  
古訓遜志時敏成王訪學于群臣曰學有緝熙於  
光明商周之君好學如此夫人主一日萬幾固不  
暇如儒生學士日夜孜孜然而帝王精一之傳治  
天下之大經大法古今治亂之迹天人精微之際  
自非遜敏緝熙亦安望其有得今乃闊略如是暴  
之之日少寒之之日多傳之之人寡咻之之人衆  
未見其能得也且不獨高宗成王爲然也漢光武  
雖在軍中投戈講藝息馬論道至夜分乃罷唐太  
宗延四方文學之士房杜褚薛輩十八人分番直  
宿討論經籍或至夜分今貞觀政要與魏徵所論  
亦可見矣宋世賢主宮中消日惟是觀書居常禁  
中亦有日課翰林侍從日寓直禁中以備顧問我



太祖甫得天下開禮賢館與宋濂劉基章溢輩日相講論其後聖學高明詔誥天下皆出御制睿翰如飛群臣拱視今御製文集是也 仁宗臨御建弘文閣於思善門之右文學之臣數人入直時至館中講論 孝宗經筵之外每觀永樂大典又嘗索太極圖西銘諸書於宮中玩之尤嗜故學士沈度之書日臨數過夫古帝王之學如此 祖宗之學如此陛下睿哲自天春秋鼎盛講明聖學正其時也臣愚特望於便殿之側復弘文閣故事妙選天下文學行藝著聞者七八人更番入直內閣大臣一人領之如先朝楊溥故事陛下萬幾有暇時造館中屏去法從特霽天威從容訪問或講經或讀史傳或論古今成敗或論民間疾苦間則遊戲翰墨雖詩文之類亦惟所好蓋亦日講之義而加親焉大畧如家人父子上有疑則必問下有見則必陳日改月化有不知其然而然者時御經筵所以昭國家之盛典日造弘文所以崇聖學之實功如是不已則聖德日新又新高宗成王不得專美於前矣親政篇曰易之泰曰上下交而其志同否曰上下不交而天下無邦交則泰不交則否自古



皆然而不交之弊未有如近世之甚者君臣相見  
止於視朝數刻上下之間章奏批答相關接刑名  
法度相維持而已非獨沿襲故事亦其地勢使然  
何也國家常朝於奉天門未嘗一日廢可謂勤矣  
然堂陛懸絕威儀赫奕御史糾儀鴻臚舉不如法  
通政司引奏上特是之謝恩見辭惴惴而退上  
何嘗問一事下何嘗進一言哉臣愚以爲欲上下  
之交莫若復古內朝之法蓋周之時有三朝庫門  
之外爲外朝詢大事在焉路門之外爲治朝日視  
朝在焉路門之內曰內朝亦曰燕朝玉藻曰君視  
朝退適路寢聽政蓋視朝而見群臣所以正上下  
之分聽政而適路寢所以通遠近之情漢制大司  
馬左右前後將軍侍中散騎常侍散騎諸吏爲中  
朝丞相以下至六百石爲外朝唐皇城之北南三  
門曰承天元正冬至受萬國之朝貢則御焉蓋古  
之外朝也其北曰太極門其內曰太極殿朔望則  
坐而視朝蓋古之正朝也又北曰兩儀門其內曰  
兩儀殿常日聽朝而視事蓋古之內朝也宋時常  
朝則文德殿五日一起居則垂拱殿正旦冬至聖  
節稱賀則大慶殿賜宴則紫宸殿或集英殿試進



士則崇政殿侍從以下五日一人上殿謂之輪對  
則必述時政利害內殿引見亦或賜坐或免穿靴  
亦三朝之遺意焉蓋天有三垣天子象之正朝象  
大微也外朝象天市也內朝象紫微也國朝聖節  
正旦冬至大朝會則奉天殿即古之正朝也常朝  
則奉天門即古之外朝也而內朝獨缺然非缺也  
華蓋謹身武英等殿豈非內朝之遺制乎洪武中  
如宋濂劉基永樂以來如楊士奇楊榮輩日侍左  
右蹇義夏原吉輩常奏對便殿于斯時也豈有壅  
隔之患哉今內朝罕復臨御常朝之後人臣無復  
進見三殿高閣鮮或窺焉故上下之情壅而不通  
天下之弊由是而積 孝宗晚年深慨於斯屢召  
大臣於便殿議論政事將大有爲而民之無祿不  
及覩至治之美天下至今爲恨惟陛下遠法 聖  
祖近法 孝宗盡剷近世壅隔之弊常朝之外即  
文華武英倣古內朝之意大臣三日或五日一起  
居侍從臺諫各一人上殿輪對諸司請事上據所  
見決之有難決者與大臣面議之不時引見群臣  
凡謝恩辭見之類皆得上殿陳奏虚心而問之和  
顏色而道之如此人人得以自盡陛下雖深居九



重而天下之事燦然畢陳于前唐虞之世明目達聰嘉言罔伏野無遺賢亦不過是而已大禮議起連逐輔臣士類咸願起公未及起病卒年七十五巡撫吳廷舉上言整高文清節守道見幾洞庭雲卧望重東山震澤波澄名高北海乞與褒卹贈太傅謚文恪

### 太保劉文肅公

公名忠字司直陳畱人成化十四年進士庶吉士授編修陞侍講再陞侍讀學士公修勵行檢時國家無事翰林程李輩有文學詞藝行交遊有聲譽公獨卷斂沉默正德二年陞南京禮部侍郎尋進尚書明年改南京吏部公性峻行方寡合一介不苟得惡士人競趨自處常過抗貴人亦力抑之以故久在南京南京名吏隱多俛仰瓦合公獨毅然持規撫奪越閩黠吏竄名籍詭冒者千人焦芳顧知公薦公賢五年正月瑾傳旨召入翰林比至相見又不喜業已召改吏部尚書兼翰林學士掌詹事府事管誥勅是年瑾誅始入內閣是時張永幸用事大臣事永復如瑾公益持重永遣其黨廖鵬來謁公不加禮如僕又却其餽永大不說公在閣



不滿三月乞致仕不許累進少傅兼太子太傅吏部尚書謹身殿大學士公輒進儻言貴倖益不悅正德六年公累疏辭疾未允強起考禮部貢士出院即乞省墓上忽召長沙至煖閣摘錄中語言欲罪公長沙爲公力解公即日陞辭去歸田杜門公在內閣未久以故無大建明然重厚持正嘉靖初遣使存問卒贈太保謚文肅崔文敏曰余爲編修時見公公言古羈人匹士雖當流離困絕不取非義財况祿食者乎許襄毅嘗論當世人物獨推章公懋雍公太語銑子初仕慎事大夫翰林惟司直一人耳

少保石文隱公

公名瑤字邦彥藁城人成化二十三年進士庶吉士授檢討正德元年爲南院侍讀學士四年南國子祭酒公靖方介恪潔已好修士類信嚮五年召國子祭酒時浮逐莠進公獨鯁狗有名八年爲南吏部侍郎十年召入禮部十六年進尚書掌詹事府嘉靖初代王瓊吏部尚書吏部黷亂者數年公以孤貞行一意柄臣不悅閱兩月解吏部以尚書兼學士仍掌詹事府事嘉靖三年五月大禮議起



諸大臣相繼去無文淵閣大學士入內閣五年六月加少保兼太子太保大學士武英殿尚書如故時時召對平臺煖閣議廟樂再議廟衢又議章聖太后 皇后謁 世廟儀守正義力爭 上謂公非通儒公又三封內批言 太后 皇后出入正朝陰強陽弱之兆忤旨六年二月致仕卒謚文隱公清修無玷毀譽不撓持論堅確不避夷險秉正嫉邪進禮退義兄玠同舉進士累官戶部尚書論曰文安無大建明亦無大過文莊博覽今古通儒其所著書多附正義羽翼經史文和處文康文穆間道不同時時相詆文康去文和又爲文穆所擠文正文恪之遇逆瑾退進殊途歸潔其身文肅去時逆瑾已誅長沙爲政竟不知其讒間所起文隱秉銓清勁不說於新都數議大禮乃不肯負新都也文隱去後而吁咈之風微矣



皇明名臣記第二十四卷

吾學編第四十五

海鹽鄭曉

懷遠伯山襄毅公

公名雲初以指揮同都御史王彰修邊自居庸至  
 山海著勞績從長陵出塞力戰功陞都督僉事宣  
 德初廷臣薦公廉勇有謀克征蠻將軍代顧興祖  
 鎮廣西廣西溪洞徭獠叛服不常歲殺掠吏民萬  
 計公至鎮嚴號令公賞罰每與賊戰臨機應變身  
 先士卒三年降南安廣源蠻四年討柳潯賊斬首  
 二千四百五年斬平樂蠻四百討慶遠諸蠻斬首



七千四百自是蠻夷畏服嶺南無警七年進都督同知公沉毅不洩用兵如神廉正自持淡然儒素馭諸士官專厲威嚴期刻征調無敢後先帥府有鄭牢者老隸也性鯁敢言公呼牢試問曰世謂爲將者不忌貪廣西饒珍貨我亦可貪否牢曰白袍黥墨終不可渝公笑曰人言土夷饋送苟不納彼疑且忿柰何牢曰居官黷貨國憲甚嚴公不畏朝廷乃畏蠻子邪公舉手禮牢曰教我教我正統元年貴州按察使應履平劾公作威福公自陳上不問卒贈懷遠伯謚襄毅初韓觀守廣西專殺慶遠諸生來迓觀曰此皆賊覘我悉推出斬之公以英國公殺黃叅將幾致大禍不敢輒殺人人亦不敢犯武臣有將略著功名贈伯者高成以騎士從靖難功累官都督宣德中卒贈營山伯謚武毅張廉起卒伍從靖難出塞征胡功累陞督府僉事宣德中卒贈榆次伯謚忠敏馬榮靖難出塞功官至右都督卒贈景城伯謚武壯冀傑東安人起卒伍靖難功陞督府僉事出塞征虜有功洪熙時守開平著恩信宣德初進都督恭謹有大節高煦反列侯諸將或持兩端輒言漢王機變不測用兵若神



傑獨罵諸言者勿妄言取族滅高煦誇詐無膽略  
况順逆曲直分明又臨以天威當不日就擒卒贈  
清源伯謚忠壯妾王氏自殉贈淑人馬聚武定人  
燕山總旗靖難功陞都指揮使三從出塞征胡功  
洪熙元年進中府都督聚體貌不揚膽力過人戇  
直不肯俛仰人卒贈邵陽伯謚壯勇妾陳氏自殉  
亦贈淑人一月中傑聚相繼卒景陵爲之悼惜梁  
成歷戰有功陞都督贈任丘伯謚壯勇正統中又  
有冉保贈宜良伯謚榮壯蕭授贈臨武伯謚靖襄  
景泰中武興贈山陽伯謚忠毅紀廣贈漂陽伯謚  
信順成化中陶瑾贈大同伯謚武毅劉玉贈固安  
伯謚毅敏國初有廖永安贈楚國公改鄭國謚武  
閔初陪享太廟已而罷巢人也巢又有孫世陳清  
世贈富春侯謚忠勇清贈合浦侯謚榮武定遠馮  
國用贈郢國公韓成有紀信之義贈高陽侯建忠  
臣廟康郎山凡三十六人成位第一又有東丘侯  
花雲太原郡侯王鼎高陽郡侯許瑗濟國公丁德  
興丹陽男孫炎安定伯程國勝縉雲伯胡深炎深  
知書好士稱文武才燕山侯孫興祖謚忠愍天水  
郡公嚴德東海郡侯茅成宜興城隍顯祐伯楊國



興安遠侯蔡遷謚武襄霍山侯王簡謚忠毅臨沂侯王真謚桓義樂安郡伯孫虎廬江侯何海謚壯毅滎陽伯潘毅謚武肅譙都伯戴德德嘗從胡將軍取福建上諭胡將軍德吾所親近勿以此故弛政凡號令征守一以軍法從事汝陰侯高顯謚武肅皆贈爵也都督葉旺馬雲功最著於遼東二人勇智兼濟同心經略納哈出竟不能窺遼

定襄侯郭忠武公

公名登字元登武定侯英諸孫也年七歲讀書過目輒成誦十歲能文詞永樂二十二年克勤衛正統七年從王驥征木鱉川有功九年從沐斌征騰衝有功歷陞署都指揮僉事十四年七月虜入塞急進都督僉事副劉安守大同會上親征成國公朱勇西寧侯宋瑛武進伯朱冕全軍覆沒倉卒議班師公告學士曹鶴張益駕入宜從紫荆關乃忽東折向居庸纜四十里虜至上北狩當是時大同堡塢蕭條城門盡閉人心危疑公慷慨自奮修城繕兵拊循士卒吊死問傷裹創傳藥衆皆感戢是年八月虜奉上皇至城下索金幣約賂至歸駕公閉門不納上皇曰朕與登有姻何外朕



若此公遣人奏曰臣奉朝命守城不敢擅啓閉竟不出劉安孫祥霍瑄出見獻上皇金帛瑄尤效力及約賄往虜笑不應竟擁駕去十月虜以和爲名犯京師公欲率所部兵并糾集中義從雁門入援先以蠟書馳奏大略謂胡馬南驅三關失險賊留連內地爲患非輕欲悉起各處官軍民壯入護闕庭使賊腹背受敵首尾不揀奏至賊已退優詔褒答上疏言虜人雖回離邊不遠傳報有云黃河已凍且向延緩青草復生再侵京闕事雖未信情亦可推乞開誠待下側席求賢擴天理克人欲以成聖學之功親君子遠小人以收天下之望十二月虜復欲犯京師公以京兵新選不可輕戰又疏曰今日之計可以養銳不可浪戰可以用智不可鬪勇此謂知彼知己可守則守其涑水易州真定保定一帶皆堅壁清野京兵分據犄角安營以逸待勞以主待客勿求僥倖務在萬全此謂不戰而屈人兵善之善者也歷陞右都督景泰元年正月賊入境率兵躡之行七十里至水頭日暮休兵夜二鼓東西沙窩賊營自朔州掠回公召將士問計或言我寡莫若全軍而返公曰我軍去城百里一



退避人馬疲倦賊以鐵騎來追難以自全即按劍起曰敢言退者斬徑薄賊營天漸明賊以數百騎迎戰公奮勇先登諸軍繼進呼聲震山谷公射中二人手刃一人遂大破其衆追奔四十餘里至栲栳山斬首虜二百餘奪還人馬器械萬計進封定襄伯食祿千一百石與世券是役也公以八百騎破虜數千爲一時戰功第一閏正月公獲虜謀二人械至京皆也先所親信鞫之云喜寧與也先謀遣人至京覘兵衆寡 大明皇帝立未立期今年五月名送 上皇奪京城誘也先入寇皆喜寧及

小田兒也先戰大同把八平章死戰北京卵那孩平章及其弟孛羅死人馬約九萬戰死疫死不下萬餘老營駐九龍口其精銳在斷頭山又言虜甚畏我大砲神銳短鎗時鎮守內臣陳公忌公會姚都指揮發陳公奸賍二十事陳公疑公巡撫沈固又言鎮守不和乞更調 景帝召陳公還諭公留鎮公憤邊事未戢弊政猶存思得公廉有爲者相與共事上疏曰往者承平日久人心驕逸在官旣無廉耻之心蒞政惟肆貪婪之志釀成污濁之風致有夷狄之禍又曰虜勢雖云請和變態豈能預



度倘或渝盟則大同一鎮首先受敵及今無事之時若不早為措置一旦賊至又似前日手無所措中國受侮已深邊事豈容再壞虜既退欲大興屯田苦民力困乏牛種俱無疏乞官為措置四年秋病召還京公初至大同士可戰者不及數百馬百餘疋不數年馬至萬五千疋精兵數萬人公智勇兼備紀律嚴明料敵制勝動合機宜一年百戰未嘗挫衄以已意設為攪地龍飛天網鑿深塹覆土木人馬通行如履實地賊入圍中令人發其機自相擊撞頃刻十餘里皆陷當是時巡撫年富知公公與都督孫鏜不睦鏜乞分公軍公亦會病稱疾不出富為聞於朝 上詰責鏜天順元年奪爵為都督僉事南京是秋謫戍甘肅茂陵即位復爵出鎮甘肅未幾召還克團營總兵八年卒贈侯謚忠武公事母至孝居喪秉禮武而能文謀而善斷公無子以兄尚寶丞斌之子嵩請於朝為後得嗣伯減祿五百石十四年卒子叅乞嗣不許授世指揮使

穎國楊武襄公

公名洪六合人祖政立功世漢中百戶公嗣官調



開平機變敏捷善用計出奇兵擣虛或夜劫營累  
功陞都指揮正統元年內臣韓政阮鷺疏公短  
上詰二內官曰此必小人左右汝即械至京姑貸  
汝二人者時公頗為衆忌 上又每舉公功勵諸  
將公益自奮公守邊屯營專用鐵蒺藜尋以都督  
守獨石敗虜宣府大石門寶昌州捕虜阿台打刺  
花斬首功二百正統十三年封昌平伯食祿千石  
克總兵鎮宣府虜畏公呼楊王十四年虜入敗我  
土木 上皇道宣府北狩去公閉城門逮繫詔獄  
是年十月虜犯京師出公獄中自効公與孫鏜范  
廣等率兵二萬擊虜涿州紫荆等處逐至固安大  
捷捕虜阿歸等四十八人斬首功四百八十邀還  
俘掠人萬計馬牛羊弓刀數萬虜去進侯景泰二  
年賜世券還鎮宣府卒贈穎國公謚武襄公紀律  
嚴明將士用命敬慎自將不敢專殺宣德正統景  
泰間稱名將諸大臣皆重公威略每左右公初指  
揮杜衡誣公尚書魏源即訊雪公貶衡廣西部卒  
李友全誣奏公 上付公自治公以故感激戮力  
也先之難奮不顧身轉戰千里一時諸將公功為  
最時石亨為大將京營忌公公又與孫鏜不相能



時忿爭公子傑嗣侯言臣家一侯三都督諸蒼頭  
得官旗者十六人乞停蒼頭職役許之未幾卒傑  
庶兄俊嗣侯俊先以擒叛者喜寧功陞都督上言  
也先往時酋長尚在東西諸番未附今既弒脫脫  
不花并其衆東自女直兀良哈野人西至蒙古赤  
斤哈密皆受約束包藏禍心待時而動又聞其妻  
孛輜重在哈刺莽來去宣府纔數百里健人壯馬  
屯沙窩去邊尤近今大同宣府懷來遼東山海永  
平寧夏延綏甘涼莊浪等處宿兵不下數十萬臣  
愚以爲險阻之處量留守禦其餘壯勇各選老成  
謀略將官統率迤西悉赴代州迤東悉赴永平結  
營操練更選京營騎兵申令股肱大臣統率至大  
同宣府會合所在兵列營堅守爲正兵其永平營  
赴獨石代州營兵赴偏頭關一帶按伏爲奇兵部  
署既定或拘絕虜使以激其怒或檄數叛逆以正  
其罪彼必來侵我正兵堅壁清野坐觀其變密遣  
奇兵日夜倍道擣其巢穴使彼前不敢進後不能  
顧必擒其妻孛獲其輜重彼或察知我謀急還相  
救我乘其奔潰奇兵夾擊立致摧敗此實戰攻取  
勝之機抑臣又聞三軍之害猶豫最甚昔在有宋



澶淵之役若從寇準之議必無靖康之悔今若間以群疑失今不治臣恐他日之患又有甚於今日者願陛下重念天下者祖宗之天下人民者祖宗之人民縱欲息兵保民暫安一時寧不思祖宗創業守成之艱乎文武諸臣何面目忍耻偷生縱此虜驕悍平臣一家父子兄弟受恩實深馬革裹屍固其分也事下總督總兵及營中諸將校議于少保言賊虜也先違天背德彼之罪惡已盈我之讐耻宜雪楊俊此疏發憤徇國但與兵舉事係社稷安危即如俊所言萬一我軍出境賊與我軍制別分犬羊由間道乘虛四散剽掠是自撤守備計非萬全國家之患非止北虜東南寇盜未除河南流民又聚豈可輕內重外更不思患預防夷狄之性利於疾速不能持久去來如風雨聚散如蜂蟻得利則鳴張失勢則鼠遁乃其常態若欲糾兵涉遠出徼倖之謀撩奸凶之虜將卒不相知號令不相統臣愚未見其可疏上從于公議先是遣俊及劉深充遊擊將軍出宣府經略獨石諸城堡參贊參政葉盛言俊往守獨石所謂敗軍之將乞遣深罷俊遂令俊護瓦剌使人出塞俊又挾私怨杖永寧



守備都指揮姪貴且縛貴斬曰我嘗殺陶都指揮上不問諸裨校力解得釋比還廷臣劾俊論死會傑卒母請釋俊葬傑得降督府僉事遂得嗣父侯後坐法罪死宥革爵子珍嗣天順元年石亨坐俊及驍勇都指揮范信等附于公斬西市調珍戍廣西奉議天順八年赦珍授龍虎指揮使孫越乞調開平公從子四人能武強伯信彰武伯仁鎰衣指揮僉事智開平指揮使

靖遠侯王忠毅公

公名驥字尚德東鹿人永樂四年進士爲兵科給事中使山西蠲徐溝鹽虧課二十餘萬陞山西按察副使召入其順天宣德二年陞行在兵部右侍郎坐事縛下獄尋復任陞尚書正統二年阿台朶兒只怕數入塞寇掠甘涼公總諸軍與便宜勅西征至軍中大會諸將轅門問將校畏敵不畏軍令者誰最甚諸將伏地仰面齊應曰都指揮安敬公立縛敬斬轅門遂大閱士伍定更番減輸輓飽士調馬養銳待虜虜至莊浪授方略出戰稍捷虜引去未幾虜復至公馳至甘州簡副將蔣貴率精騎追擊戒貴曰努力破賊樹功名否無相見貴遇虜



石城兒泉戰敗虜虜尚數窺邊近公曰虜未大衄  
不畏我不退去我罷於奔命遣謀知虜巢所在復  
用貴先鋒公率兵與都督任禮等分道出塞期會  
夾攻轉戰二千餘里俘虜人畜數千上勞公金  
幣兼大理卿支二俸還京六年雲南思任發叛木  
麓川木麓川本百夷僻遠不當中國一郡公統兵  
十五萬轉餉半天下至雲南大暑衆請且按兵公  
曰賊方熾毒吾民行不可緩敢阻軍者斬部署至  
金齒分三道擣上江上江者賊巢也攻三日不下  
會大風縱火焚賊柵乘勢力戰斬首五萬賊退走  
保險拒我我兵深入破連環七砦於沙木籠山又  
破其象陣馬鞍山思任發遯移兵討韋郎羅韋郎  
羅者維摩賊僭稱廣新三公遣偏師抵賊境言王  
尚書大軍且至賊黨潰韋郎羅走安南傳檄且入  
安南追賊安南人懼斬其首并縛妻子來獻七年  
班師還京封靖遠伯食祿一千二百石世指揮同  
知未幾思任發自緬甸復反驥督征發卒轉餉三  
十萬人擊思任發緬甸思任發遁革麓川宣慰司  
設隴川宣撫司于隴把加祿三百石是年巡寧夏  
甘涼塞十三年木麓川賊孽思機發反孟養公又



督軍至金沙江賊堅柵西峯拒我公潛渡破賊柵  
思機發遁苗富蟲者僭稱剋天王公充征蠻將軍  
討之獲俘獻京師加祿一百石景泰元年與世券  
行在兵部右侍郎柴車言虜性譎詐叛服靡常脫  
脫帖木兒者永樂初隨其部長把都帖木兒等來  
歸未幾叛去迨今三十年又復來歸安知異日不  
叛况京儲漕運不易請因其初來分處江南衛所  
下兵部公言永樂間來降達官柴永正等分住真  
定等府乞如例遣送河間德州等處授田廬俾耕  
牧自便著此爲例 上從之尋改南京兵部總機

務二年罷天順元年復兼兵部尚書加祿一百石  
尋請老四年卒年八十三贈侯謚忠毅公沉毅宏  
偉有文武才遇事果剛用法嚴明子瑞嗣侯成化  
七年卒子添嗣十五年卒子憲嗣正德九年卒子  
瑾嗣

### 都督王公

公名信字君實南鄭人正統中世官寬河千戶父  
忠征迤北歿戰毋岳氏生公半歲持節旌爲忠臣  
節婦已已虜犯京師拒戰西直門功陞指揮僉事  
景泰六年從征五開諸蠻遷指揮同知天順五年



破曹賊東市遷指揮使成化初守通州改守倒馬  
關移守荆襄二年石和尚劉千斤反荆襄公進據  
房陵民兵不滿千人賊四千餘衆突至圍公主帥  
逗遛不援公多張旗舉火晝夜不息歷四旬餘間  
以死士出城五六里舉火礮賊以爲援兵且至驚  
走追斬有功陞都指揮同知鎮臨清兼管倉糧決  
獄明慎請託不行移鎮湖廣條陳八事曰繕城隍  
廣儲蓄省徭役立賞罰選能官禁窩戶練將才慎  
守備又條上慎專任以利民情實倉儲以備兵荒  
修兵衛以圖無患禁科罰以省財用十七年疏言

湖廣蠻夷雖腹中之蠹實無能爲但我軍姦黠之  
徒利其竊發可以邀功今但選精銳常加隄防勿  
蹈前非其患自息荆襄流連本意逃避徭役長子  
老孫已成家業濫加誅殺非惟死及無辜恐致傷  
和氣南畝之農無所蓄積歛獲未竟餽糧已空機  
杼纔停布縷何在求免饑寒不可得乞選公正仁  
惠守令大加存恤濫陞官員無慮千百無一矢之  
勞冒崇階之賞乞查勘削奪三司方面所以折衝  
禦侮承宣激揚者也當公以格物庶以律已端本  
澄源在朝廷而已所部指揮劉斌張全智勇過人



各日記  
卷之二十四  
力薦於朝且云英俊之士處心剛正寧肯抑心低  
首奔走媚求若不曲加攬訪則賢才多隱志士沉  
匿任用何能廣乎陞都督同知總理漕運即日上  
道嘗語人曰荷國厚恩未能報稱此行當以江水  
洗滌肺肝少盡區區耳公沉毅簡重被服儒素出  
入省騶從人莫敢犯歷鎮大邦不營私產平居默  
坐展玩經史寬袍緩帶糲飯蔬羹故人昏喪傾心  
賑恤無所顧吝出鎮三十年笥無華衣廐無肥馬  
鈴閣之下寂無人聲金玉歌玩一無所好子繼善  
從善皆舉進士有名

威寧伯王襄敏公

公名越字世昌濬人景泰二年進士廷試時風塵  
蔽天颺公卷去監試陳御史爲請得再給卷初爲  
御史有名天順四年起陞山東按察使七年陞右  
副都御史巡撫大同成化元年請告還京去還家  
三年召署院事六年禦虜延綏有功轉左又以黃  
草梁功陞右都御史八年以寧夏功轉左明年出  
延綏搜套搗虜巢斬虜首二百八十加太子少保  
還掌院事十三年加太子太保兵部尚書兼憲職  
十六年出大同禦虜時汪直專喜事開邊直薦公



及保國公永遂與直統兵而西未至榆林虜大掠  
出塞公曰受命討虜無俘獲何以輒班師遂與直  
永議潛師出塞至威寧海與虜戰斬首功四百封  
威寧伯食祿千二百石與世券仍左都御史掌院  
事十七年出寧夏尋珮征西前將軍印充總兵鎮  
大同移鎮延綏斬虜首功加太子太傅增祿歲四  
百石掌前軍都督府事提督團營叙一子錦衣百  
戶明年言官交章劾公爲詩怨望上怒奪公封  
編管安陸弘治元年陳寃許還鄉七年又陳寃下  
廷議公功過復左都御史致仕十年虜大入塞陝  
西急起總制寧夏甘涼諸路軍務并經略哈密召  
至陛見加太子太保公有才略著威望再起益奮  
勵出塞襲斬賀蘭巢虜奪還掠我人畜加少保兼  
太子太傅十一年卒軍中贈太傅謚襄敏王文恪  
公曰世昌紅鹽池劫虜取勝本兵家奇術議者往  
往黜其功崔文敏公曰少聞世昌文武大略比入  
翰林人多言其任術不足數及修太陵實錄得見  
國史知其塞上功甚偉世昌姿表奇邁慷慨自許  
論議英發見事風生久膺師寄歷西北諸鎮身經  
十餘戰其於邊徼險易虜情真僞將品士勢定諸



何臆嚴如示掌出奇取捷慮成發中顛倒才智柔  
馴辨強皆樂為之用效之者皆自以為不及其所  
見所執壯老一致雖罹挫衄而志不少衰善獎拔  
士類嘗特薦楊守隨侶鍾屠肅王濬四御史健將  
武校多出其門又長於吏事判案章奏口占授史  
曲當事情博學多聞凡兵法射藝象緯堪輿之說  
罔不該究為歌詩雄邁跌宕若不屑意陸族敦舊  
凋窮卹貧接接卑幼如恐不及

錦衣牟公

公名斌字益之正德初掌錦衣鎮撫並瑾竊政逐  
方正大臣言官劉蒞戴銑等凡數十人一時下詔  
獄公輕刑緩械曲為申救任御史者自愬諸僚上  
奏時置其名彼寔他出公曰古人耻不與黨人爾  
為忠乃悔邪瑾令復獄詞去銑疏首權闡字公不  
肯謂其僚曰存此則諸君子臣節白他日昔宋鄒  
道卿以失原奏被害吾儕毋自為計奏入瑾大怒  
又偵知公庇言官矯旨廷杖公垂死瑾誅公復任  
鎮撫知府劉祥與內臣相訐下公治內臣賄張雄  
令曲祥并賂公公不從雄陷公安置武昌感疾而  
卒公再用時長子死工部官賻三百金公指其兩



名臣記 卷之十一  
二子曰斌司不道天禍一子天若受金行及此矣  
公庫屋敝衣再遭禍怡怡若分然崔銑曰正德中  
前則劉瑾慘行其毒中則張永巧蓋其惡終則張  
忠張確錢寧江彬肆其愚暴士靡靡矣全臣節者  
大學士劉公忠尚書傅公珪及公凡三人公前有  
袁斌者以小校從裕陵址狩當是時文武群臣或  
捐軀草野或奉頭鼠竄彬獨從上恭謹服勞駕還  
入南宮陞試百戶復辟後陞都指揮掌錦衣衛事  
門達中傷彬調南京達敗戍邊召彬還嘉靖中劉  
東山之獄錦衣王佐忠勤廉勤有名

都督馬公

公名永字天錫遷安人世金吾左衛指揮使父榮  
鎮番叅將公讀左氏春秋及兵法襲父官機警善  
騎射正德六年流賊起督戰功陞都指揮同知江  
彬統宣府兵練西內公以千總隸彬稱疾不起彬  
強起稱病篤以故得脫彬禍十年守備遵化明年  
虜入馬蘭峪塞殺叅將陳乾以公爲叅將守太平  
寨十二年虜入塞戰柏崖堂再戰白羊峪斬首五  
十十二年陞署都督僉事克總兵官治三屯營尋  
署都督同知盡簡諸軍散遣老弱聽其農市取其



庸倍給諸健武者衣餉健武者又皆喜人人奮習  
武藝當是時漁陽一軍稱雄未幾 上至喜峯口  
欲出塞公扣馬諫不可 上注視久之顧內侍曰  
此馬永耶笑而止朶顏酋把兒孫結諸虜邀官賞  
不得輒入塞公迎擊洪山口大敗虜斬首五十八  
陞右都督嘉靖三年把兒孫入青山口塞斬其驍  
酋遁去把兒孫自是效順保塞四年大同軍亂殺  
都御史張文錦叅將賈鑑用兵不利朝議且撫公  
上疏力言不可撫他日九邊效尤將有唐室河北  
藩鎮之禍勅公提兵出居庸討賊俄以流言中止  
五年公上言乞宥諸言大禮獲罪者又言陸完有  
平賊功宜贖罪錄用其子奪總兵寄祿南京督府  
十二年大同再亂殺總兵李瑾討之久無功廷臣  
薦公召至業已撫罷兵復還南京十四年遼東軍  
亂逐都御史呂經召公總兵遼東十七年虜入塞  
率兵五千人搗虜巢焚其廬還十八年遼軍再亂  
率家兵逼賊斬四十餘人遂定陞左都督公卒於  
遼東遼人為罷市哭喪過漁陽漁陽人皆哭兩鎮  
皆祠公公為將善調虜情先所從來及眾寡設  
伏待虜以故虜往往失利去公善養士同甘苦又



善知人獎拔蕭陞劉淵祝雄皆起列校爲方鎮

太保梁武壯公

公名震新野人世榆林衛指揮使忠勇好讀兵書  
嘉靖七年陞署都指揮僉事協守寧夏興武營慣  
戰敢先登破虜八年進遊擊將軍益憤志撫士卒  
練訓東西援應有斬虜功十一年進副總兵延綏  
十三年斬虜首功歷陞都督同知十四年總兵鎮  
守陝西當是時關中少虜患大同宣府虜數入塞  
殺掠吏民十五年陞右都督改總兵大同大同自  
五堡之役殺巡撫張文錦叅將賈鑑尋又殺總兵

李瑾鎮巡每甘言煦之稍不如意即及唇瞪目或  
飛章訛語相搖撼公聞命率家丁五百人馳至雲  
中申嚴約束曰我無爾陵爾無我叛王法軍令具  
在我不敢破綱紀誤國其家丁時時向鎮兵語曰  
爾敢蔑主將者恃衆耳兒郎輩無不一當百五步  
內恐爾不得用其衆鎮兵稍斂縮十六年春公率  
兵出玉林川斬虜首一百四十進左都督又出黑  
山門貓兒莊各斬首八十叙一子百戶十八年公  
鳩卒給餉修五堡軍中不敢譁公益身先之與同  
甘苦五堡竟復虜不敢近塞公卒以五堡功贈太



子太保公卒後五堡亦旋廢十九年二十年俺答阿卜孩吉囊三入雲中塞直逾太原窺平陽公不死五堡不再廢虜亦不敢輒輕入塞自是鴈門河東雲中上谷殘破朝廷亦思公優與卹典贈太保謚武壯公在邊專練家丁時時出塞劫虜營虜不敢輒近塞得虜營馬盡與諸出塞劫者以故人皆效死趨利虜以故益畏公或謂公出邊起釁曰起釁律有之謂承平時虜牧獵爲生不擾我邊而我邊將撲殺邀功也乃今虜數深入駐帳塞上官堡民堡十去七八我曾搗巢否也公卒家丁無所

歸守臣以聞令入伍與衣糧邊將頗得其力

論曰余觀彭楊林徐四公叙名臣錄贊何其略武將也因稍述所聞詮次其事令後世得覽焉撫寧侯朱謙懷寧侯孫鏜定西侯蔣琬襄城伯李隆新寧伯譚祐鎮遠侯顧仕隆啓封嗣秩並著聲猷語在異姓諸侯傳中邊鎮總兵王效桂勇杭雄何卿沈希儀周尚文安慶守將崔文楊銳漕帥王瑜劉璽死諫指揮使張英戰歿叅將陳乾張世忠皆名將尚未錄也馬都督梁太保余所見者

皇明名臣記第二十四卷終

子履準校正



惟少因謀亦復聞益其謀人必於世其變其無變  
命曰全德也其林命曰公餘必曰其贊其其相先

皇明名臣記第二十五卷

吾國編第四十六

海鹽鄭曉

都御史楊恭惠公

公名信民新昌人永樂中舉人宣德間擢工科給  
事中正統間陞廣東左叅議嘗劾罷按察使被逮  
至京廣中數千人走萬里詣闕疏公公勤廉能乞  
留以安百姓得復職適南海盜起陞僉都御史守  
其地公宣布恩威獎勵士卒屢戰屢捷撫歸數萬  
人景泰元年卒官廣人手香燈弔哭者幾萬人錄  
其子玠為太學生廣耆民又相率走京乞立祠祀



公著祀典成化中謚恭惠

都御史韓襄毅公

公名雍字永熙吳人正統七年進士爲監察御史奉命錄囚碭山學教諭責膳夫祝磨兒磨兒父令逸去告教諭殺磨兒棄其尸他御史坐教諭死以屍不得故輒稱寃會黃河傍有尸支解者磨兒父執兒尸也教諭辯不得解竟誣伏公疑不決遣人蹤跡獲磨兒教諭得釋十三年巡按江西會廬陵賊起公與巡撫侍郎楊寧捕斬二百人解散其衆陞按察副使廣東不數月少保陳循薦陞僉都御

史巡撫江西四年未三十練達吏治曉習人情黜奸貪疏寃滯均徭役平市價恩威大著凡所注措後按爲格例他巡撫不能改景泰七年劾寧王不法并論府寮上遣大臣即訊奪王護衛罪諸府寮天順初謫徙邊公調山西副使坐累致仕二年起爲大理右少卿尋復右僉都御史錦衣指揮劉敬坐飲石亨直房論奸黨公曰律意結交亂政者爲奸黨今以一飯坐罪赴宴會者東漢時朋黨二字陷忠賢覆輒不可蹈是冬巡撫大同陞辭召至文華殿賜鈔上諭善爲朝廷守北門公精悍闊達



有智略時出已意經畫防守城堡部署將校糾去  
奸蠹訓練士伍逾年戎政大脩虜不近塞七年還  
議事 上喜公狀貌陞兵部右侍郎諭南陽曰邊  
撫臣宜得如雍者南陽薦山東按察使王越代公  
越至見 上上又喜曰是將官也 裕陵崩坐事  
左遷浙江右叅政成化元年兩廣巡撫懦不振有  
蠻寇以都督趙輔爲征夷將軍用兵兩廣王竑薦  
公以僉都御史贊理軍務勅公及輔會南京議衆  
欲分江西兵從遊擊將軍率達官由庾嶺入廣東  
逐賊大軍從湖廣入廣西合諸兵圍困勿與鬪公  
曰不然古者伐鉞臨戎專制夫兵聚而爲正分而  
爲奇今兩廣已無完郡舍大藤峽賊巢不置而趨  
其末未見其能濟苟全師至彼南可攻大藤峽援  
高廉雷東可應南韶西可取柳慶址可斷陽峒諸  
路勢如常山蛇動無不應攻無不克何煩於逐自  
古蠻夷來寇不可以禮義較惟戰勝自戢叔敖云  
寧我薄人軍志曰先人有奪人之心薄之也兵貴  
拙速不尚巧遲何泥於困衆從公會諸軍出東道  
遣偏師平陽峒諸賊又進平修仁荔浦諸峒遂直  
抵大藤峽奪其險塞焚其積聚四面夾攻斬俘四



萬一千有奇盡降其餘黨斬其藤改爲斷藤峽置  
藤縣千戶所控賊出入刻石紀功班師陞左副都  
御史提督兩廣軍務兼巡撫蔭子錦衣所鎮撫公  
以與弟睦四年公言嶺東西地廣山深恐餘孽復  
作宜預爲彈壓請得文武大臣分理六年陞右都  
御史總督兼巡撫開府梧州公得承制專決盡法  
繩下不貸大吏以故謗議遂起內臣黃沁忌公束  
縛不得肆嗾人上書誣公 上爲遣使即訊公引  
疾乞歸卒年五十二謚襄毅公明經讀律洞達凱  
爽篤於孝友與人交有信義不爲岸谷臨戎蒞政  
豹變鵬搏雖發奸摘伏而事簡心平每有惠澤江  
西嶺南莫不畏如神明愛如父母摘詞洒翰風生  
泉湧天才逸發

太子少保鄧襄敏公

公名廷瓚字宗器巴陵人景泰五年進士爲淳安  
知縣問民疾苦專施惠政不求赫赫名終九載無  
知者兵部尚書張鵬時以都御史巡撫廣西知公  
薦知梧州府會母憂去貴州程番初府在萬山中  
夷獠雜聚難治以公知程番公悉心規畫凡城郭  
街衢廟宇廨舍以次興建榜諭諸夷使受約束政



令公平莫不感說。猥田不踰界入市不二價。四境晏然。蔚如中州。巡撫貴州。適黑苗久叛。益肆守臣告急。勅公往視。兼提督軍務。初撫不從。始合衆謀。調兵食。決策征勦。兵至其地。號令嚴明。將校用命。斬首六千。獲二千。械首惡。俘京寇。既平。奏言。都勻清平。舊設二衛。所屬九長官司。其人世祿驕縱。稔惡釀患。致夷人侵田奪貨。逞欲無厭。已四十餘年。軍疲于戍守。民困于轉輸。其害不可勝言。今幸黨惡削除。非大更張。不能爲保境安民之計。條上十。一事。下兵部議行。始設都勻府。一獨山林哈州二。

清平縣一。更設流官。與土官兼治。以右副都御史召入臺。未幾出鎮梧州。兩廣自成化初。韓襄毅平寇後。開府梧州。率以憲臣有才望及官高者。總督軍務。兼巡撫。公性不瑣瑣。益思安靜。爲治屬吏。有賢者。輒薦舉。或不職。特去。一二太甚者。奏除。諸冗吏曰。祿奉出于民。毋徒費。顧群蠻以劫掠爲常。往往出沒閩楚諸郡。公言。都御史金澤巡撫偏方。非宜。宜以江西一省付澤。使二司聽節制。庶軍馬錢糧可以調度。其湖廣衡州設兵備。憲臣遷治所。郴州便。又以廣東瀧水爲賊巢。宜即其地設千戶所。



調軍守禦仍宜給隙地屯種爲久計公於群蠻結以恩信兵不輕出出則成功若鬱林川雲鑪大桂諸種作亂以次討平其後四會諸下縣饑盜竊發勢尤熾公斬獲首惡李景光輩傑及其黨二百餘人餘悉解散歸農公歷官處事求濟待人不疑雅量廓如莫窺其際至所設施動中機宜其中明炳人亦莫能及卒贈太子少保謚襄敏兩廣總鎮又有桂陽朱英正統十年進士初爲御史禦賊葉宗留處州劾外戚汪金內臣善增陞廣東叅議葉文莊公每事詢英叅政陝西調兵食征固原巡撫計肅條邊事陞兩廣督撫專意安輯兵革久困民得休息流人復業者十五萬家出入十年召入臺加太子少保卒贈太子太保謚恭簡英性度宏暢才通敏剛介而仁恕所至有惠政慈谿姚鏌弘治六年進士有文學達吏事倜儻有負荷嘉靖中督撫兩廣土酋岑孟積凶狡數十年鏌討誅之遭讒而去

尚書雍公

公名太字世隆陝咸寧人成化五年進士授吳縣知縣吳濱湖湖漲淪田千頃公作堤民受其利稱



雍公隄吳民有妾亡者妾父訟其夫密殺吾女兩  
月匿尸湖中石下召訊夫夫曰妾逃兩月踪跡不  
可得妾父脅財始知死所公使人視其尸乃訊父  
曰夫密殺汝女汝安知匿於石下此又豈兩月尸  
邪此必非汝女汝殺他人女冀得賂一考而服十  
年召爲監察御史舊令行吳人富好饋公不受一  
錢巡鹽兩淮淮竈丁貧而鰥者幾二千人公巡滿  
俱與完室歷陞浙江右布政使時勢家鬻販私鹽  
鄉人效尤幾至千輩盜竊橫行公先收勢家人抵  
罪於是群盜悉平爲都御史巡撫宣府叅將李穉  
不法部下狀其惡公具草且聞上稽跪堂下乞受  
責圖自新公曰此亦軍法也縛下杖之二軍股慄  
穉已乃譖公時相言官遂劾公以擅辱將官罷退  
居韋曲別墅不涉城市正德二年給事中潘鐸薦  
公有敢死之節克亂之才詔起左副都御史操江  
固辭弗允未幾陞南京戶部尚書時逆瑾用事以  
公鄉人欲親用公公不應遂斥公去而諸所嘗薦  
公者鈞陽靈寶皆獲罪公歸復居韋曲日焚香讀  
書與鄉人論禱事不與上官相見族黨有犯必告  
有司曰某是某非幸無以太故屈法年八十卒



尚書吳公

公名廷舉字獻臣嘉魚人戌籍梧州成化二十三年進士授廣東順德知縣潔已字民時華容爲左布政使知公移公輒具尺書公益盡力效職有都御史召見公甚溫廷舉請事都御史曰順德有大錯某者屬我修其家廟縣令可理葺之公謝曰令非有舊例新恩一夫不敢役一錢不敢費也市舶太監出銀市葛公即以銀市二葛曰奉此爲式如不中請還金且葛雷產也太監怒取金去汪御史惡公曰彼專抗上官市已能者會公壞淫祠撤其

材作土堤書院賢館修學宮御史按而會其直竹木碎屑計斤兩公囚服梏手日詣訟所士夫群泣訴公亡私盜狀御史大慙釋公弘治九年都御史者入爲吏部尚書時公爲令十年矣遷成都同知起復改松江上疏請修軍政十八年廣東盜起陞兵備僉事討平十三村池水盜正德二年革兵備三年改鹽法兼屯田四年陞廣東右叅議再逾月陞瓊州兵備副使時逆瑾專權公發鎮守內官潘忠二十罪又奏有旨取省帑解京皆非正費曰貢進內也曰司禮打點錢賂瑾也又疏便宜事忠亦



許公五年瑾矯旨坐公枉道荷校不死戍雁門再  
月赦罪還鄉是年瑾誅改雲南兵備副使六年陞  
江西右叅政討桃源賊時總制數易官兵不協力  
歷數年費萬計賊益熾公饒智畧勇不避難及逢  
盤錯益喜與副使胡世寧發憤欲設奇取捷平賊  
且諭解散反爲賊得賊劫公求撫公詞色不撓久  
之伺得賊中要領誘勁賊執其酋出公復入討平  
之九年陞廣東右布政使立番舶進貢交易之法  
平傳役十年嶺西猺獠作亂兼兵備副使撫治廣  
肇諸府十一年轉左十二年湖南饑陞副都御史

賑濟十三年勅勸永順保靖兩江口夷情公爲堅  
明約束條奏上十四年還京復出湖南定諸夷地  
界又疏言六事備宸濠變宸濠大恨惟恐公巡撫  
江西嘉靖初召爲兵部右侍郎上疏忤輔臣改南  
工部又改南戶部晉右都御史理南畿折豪強植  
貧弱禁私驛止妄工南圻肅然公長身而瘠面如  
削瓜敝衣帶穿不修藻飾神采英毅志識雄偉言  
行必自信人鮮能奪之視財利如糞土妻子饑寒  
而施予不較有仁陞南工部尚書即疏歸歸二年  
卒年六十六公居湫隘下郭外田顧有書至萬卷



卒之日不能斂都御史姚鏌爲之經理崔文敏公稱公貞才潔履厚行定力鮮儷也又曰公恒衣食人妻子乃不能給朝夕官四十年百瘁九死不能一月安于朝推下賢哲不憚屈已卒未聞報德者論曰大臣持繡斧督撫方隅固欲其威望素著然必有恩信焉非約已裕人與士卒同甘苦與農畝共休戚而徒欲以武健鬻夷蠻金璧媚津要數月日幸無事得內遷即荆祠樹碑稱頌功德人誰信之此五公者信心而行磊磊落落恩威孚布沒世不忘卓乎不可及矣

皇明名臣記第二十五卷終

皇明名臣記第二十六卷

吾學編第四七

海鹽鄭曉

少保林莊敏公

公名聰字季聰寧德人正統四年進士爲刑科給事中劾石亨楊洪孫鏜諸大將及內臣善增金英著風裁景泰元年遷都給事中 上皇將還會有投匿名書者王文端得之高文義所王與胡忠安欲聞上曰此所謂禮失而求諸野已而或出危言事且止公䟽言直淡皆股肱大臣不當私言齟齬大政詔按之高曰得之小隸小隸曰得之道路



上怒急捕千戶龔遂榮挺身自白曰迎 上皇禮  
本當厚遂榮投此帖冀感動無他腸甘死無悔已  
乃下廷議或言也先遣使行成虜不可信即迎駕  
一車二馬足矣公言 上皇北狩與陛下迎鑿皆  
社稷綱常大計宜厚無他日悔竟從議景泰三年  
議易儲改右司直郎不敢辭也先遣人來貢自稱  
田盛大可汗公言也先弒逆縱中國不治夷狄不  
可納其稱謂四年商文毅薦復爲吏科都給事中  
乞禁中外官奪情起復又劾吏部尚書何文淵刑  
部尚書俞士悅通政司李錫工部侍郎張敏諸大  
臣益多忌公王少保璘御史王溥劾公挾持吏部  
甥選教官得善近地下廷議按致公賂不得坐比  
擅選法死胡忠安不肯署稱病卧數日 上遣中  
使問對曰老臣本無病聞欲殺林聰殊驚悸遂病  
上立解公左遷國子學正裕陵復辟超陞右僉都  
御史賑山東饑陞右副都御史捕江淮鹽賊天順  
三年內艱明年起復又明年曹欽反起大獄牽連  
寃濫冒功者至割乞兒頭上功都人不敢夜出公  
時署院事力請禁戢平雪讐嫌成化二年江淮旱  
人相食公往賑奏截漕粟數十萬明年九載滿秩



陞右都御史七年出撫大同將吏用命邊事稍寧  
逾年致仕越二年起掌南院又三年召入爲刑部  
尚書加太子少保讞獄詳明清聲益振十五年與  
定西侯蔣琬按事遼東鈞陽及御史強珍竟坐謫  
戊明年乞致仕不許十八年卒贈少保謚莊敏公  
恂恂和易身若不勝衣遇事可否大義毅不可撓  
抗議易儲直聲大振宦歷所至傾朔風采晚更爲  
謙厚稍示包荒

尚書王恭毅公

公名燾字同節廬陵人正統七年進士敏達有才

暢習吏事初授刑部主事歷員外郎郎中屢遷河  
南按察使所至案無留牘獄無冤詞天順初被誣  
下獄會襄憲王入朝 上問所過官吏賢否王對  
曰臣過河南百姓遮道訴王庶使冤且言王庶使  
清勁鋤豪拊善有恩有威殿下幸爲百姓奏 皇  
帝還我王庶使 上喜立命法司雪公還任尋陞  
右副都御史巡撫陝西設法救荒全活數萬人流  
徙歸業天順七年遷大理卿出入十年凡兩法司  
及畿藩讞奏叅錯情法多所平反時吏諳律比者  
類多深刻爲名公獨持明允濟以長厚諸所審駁



會文切理倫要簡暢轉相傳錄類成卷籍成化八年遷刑部尚書疏陳時政十事 上嘉納商文毅知公薦代姚文敏吏部主議者不喜南人竟用尹同仁十年卒謚恭毅子臣成化五年進士翰林侍講廣西叅政

尚書陳康懿公

公名俊字時英莆田人正統十三年進士歷官戶部父珪教諭沒文昌公蹈海迎柩不家於喪征秋青草天津諸衛公言舊負未蠲新額荐積人不能堪詔減三十五萬束天順五年兩廣合兵討叛蠻

公假便宜勅督軍興內艱起復明年蠻平解兵始得奔喪成化元年以戶部郎中陞南京太常少卿四年召戶部右侍郎公練習錢穀凡四方災傷邊鎮請芻粟爲裁盈縮條析利害曲折佐尚書楊鼎鼎亦能聽公言七年京師大饑勅公出太倉米百萬斛賑糶公禁絕射利者請石以上閉不與八年虜入河套兵出公督餉上便宜乞內帑助邊除徑道發丁飛輓軍興不乏榆林大捷進俸一等明年改吏部十三年侍郎九載陞南京戶部尚書歷吏兵二部又九載請老公孝友廉慎沉毅簡質南曹務



閑惟戶部金錢布穀出納與內外諸司相關多撓  
沮不可盡如法公一按典則制國用省財不啻數  
十萬卒謚康懿

都御史黃公

公名紱字用章封丘人曾祖思豫事孝陵掌太常  
事以罪編氓沅州又徙戍平越公以故爲平越諸  
生舉雲南正統十三年進士行人歷南刑部郎中  
廉直遇事颺發即重忤時貴不恤必欲行已意人  
或笑黃郎中呆公正色抗言不移沮亦竟以是得  
名譚千戶者大猾任俠結懽貴顯人嘗奪民蘆塲

萬畝貴顯人業與譚千戶酒飲食往來即知民枉  
不能直公竟盡法直蘆塲歸民歷四川叅議叅政  
右布政使數年初督松茂軍餉効治將領侵冒擒  
諸倚勢豪肆邊上者叅政過崇慶忽旋風起輿前  
擁不得行公曰卽有寃且散吾爲若理風遂止抵  
州沐而禱城隍夢中若有神言州西寺云公密訪  
州西四十里有寺當孔道倚山爲巢公旦起率吏  
兵急抵寺盡係諸僧諸僧中一人少而狀甚惡詰  
之無祠謀卽塗醮聖額上晒洗之隱有巾痕公曰  
是盜也卽訊諸僧諸僧不能隱盡得其奸狀蓋寺



西有巨塘夜殺投宿人沉塘中衆共分其囊負有  
妻女則又分其妻女匿妻女隱窖中恣淫毒久矣  
公盡按律殺僧毀其寺倉吏倚王親侵沒官糧萬  
計王曲庇倉吏公竟按如法公爲錢穀吏精律比  
輒能發摘奸伏威行川中青神令聞風解綬走去  
右使時奏閉建昌壩左使胡廣妖僧繼曉至勢薰  
人公曰繼曉以妖術故不離上左右今且得罪避  
出名掃墓實逸賊熾武昌府館之後堂好飲食無  
令得出入俄事敗繼送京師伏誅副都御史巡撫  
延綏効參將郭鏞等擒豪奸張綱公行道望見川

中飲馬婦片布遮下體大慚俯首嘆息曰我爲巡  
撫令健兒家貧至此何面目坐臨其上亟令豫出  
餉三月邊健兒素貧苦延綏特甚大臣巡撫者輒  
厚自奉健兒雖凍餓死不問延綏人又素忠朴至  
死無怨言聞公慙嘆軍中人人感泣願出死力爲  
黃都堂一戰虜虜亦不至俄有詔毀廢寺公令汰  
尼盡轉軍門給配軍中壯無妻者比公去延綏有  
携子女拜道傍送者已爲尚書戶部益不屑顧忌  
威稜截然盡革財賦內外諸積弊改左都御史入  
臺天下仰望風采公躔直崖異忤人自恐伏禍不



可測請老去未幾卒

尚書黃文毅公

公名孔昭初名曜以字行政字世顯浙太平人天  
順四年進士年十四遭父母喪哀毀骨立既長執  
友建寧守賀滋知其賢薦松溪訓導不果嘆曰士  
有志用世乃籍人薦舉耶樓居讀書刻苦特甚志  
忘寢食清介有守自舉進士即著廉名爲屯田主  
事察友忌公嗾奸吏誣奏事竟白同察坐傾險去  
官公以故譽益起陞都水員外郎調吏部歷陞文  
選郎中持銓清慎汲汲以人才爲慮常曰國家之

用猶農家之積粟粟積于豐年乃可以濟饑才儲  
于平時乃可以濟事自頃人矯激沽名以閉門謝  
客爲高天下人才何由知之公退客至輒見詢訪  
有得必書于冊量其才隨其地望參之輿論薦用  
各當其才或因勢家干請欲私用其人輒力言不  
可即不能盡沮後其人多自敗公不妄交游陳恭  
愨謝文肅獨以道義相好奉詔薦應天府尹樊公  
瑩福建按察僉事章公懋公體貌嚴重不躁語戲  
笑沉靜自守厚倫睦族讀書尚理致尤精詩格文  
肅言公在文選每見其喜則知賢者之得進見其




名目記 卷之三十六  
憂則知小人之不得退如是者蓋十有五年始終  
一節不少變陞右通政通政五年陞南京工部右  
侍郎三原屢薦公竟未及柄用而卒張莊簡稱公  
學純志潔公正剛直重如山不依勢以動介如石  
不逐物以移嘉靖中贈禮部尚書謚文毅子甫亦  
為文選郎中甫子綰官生從張桂後論大禮歷官  
禮部侍郎遣使交南陞尚書未行落尚書以侍郎  
致仕

論曰莊敏風節著于言路恭毅之刑名文毅康懿  
之用人理財皆可謂成章矣封丘孤勁廉朴必行  
其志當是時已不能盡其用矣

皇明名臣記第二十六卷終

子履準校正





日  
問  
所

其  
所  
問  
所

三



